



18. august 2023

UKA 2023/114

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Motorcykelinik ilumut eqqussisoqarsinnaangussanersoq oqallisissiatut siunnersuut.**

(Inatsisartunut Ilaasortaq Bjørk Lange Olsen, Demokraatit)

Kiffaangissusermik nuannarisalerujussuuvunga. Inuuneq nammineq aaliangersorsinnaallugu kiffaangissuseqarneq. Inuuneq nammineq akisussaaffigalugu. Taamaattumik innuttaasut ataasiakkaat motorcykeleqarniarnerlutik namminneq aaliangersorsinnaasariaqaraluarpaat. Aaliangersinnaaneq tamanna ullumikkut piginnilarput, 1980-miilli motorcykelinik eqqussisinnaatitaasimangilagut. Isumaqarpunga 70-ikkunni pisut aallaavigalugit aaliangersaasimaneq maanna eqqarsaatigeqqissallugu piffissanngortoq. Ukiummi 50-it qaangiussimalerput. Taamanikkormiit inuiaqatigiit allanngoriarsimaqaat, aaliangersimanerillu qangaaniit pisimasut eqqarsaatigeqqittassallugit peqqinnartuuvoq.

Imaapporlu nunatsinni motorcykelinik ingerlanissaq inerteqqutaangimmat, taamaattoqassappalli 1980 sioqqullugu motorcykelit eqqunneqarsimasunit tamanna pissaaq. Taamaattumik maani Kalaallit Nunaanni motorcykelinik ingerlanissaq inerteqqutaasuusoq, tikisitsisinnaaneq periarfissaanngippat.

Naqissuserniarpara siunnersuutigineqartoq uanga pingaartitannut tunngassuteqarmat. Nammineq motorcykelinik ingerlasimangilanga, kisiannili innuttaasut tamarmik inuunertik nammineq aaliangersorsinnaanerunissaat sulissutigissallugu qulakkeerusuppara. Ataatsimut isigalugu maani nunatsinni inerteqquteqarpallaarlutalu maleruagassat pisariaqanngitsunik amerlavallaanik peqarpugut, innuttaasullu kiffaangissusaannik aammalu periarfissaannik killilersuisunik.

Tamanna oeqaatigereerlugu nammaqatigiittoqarnissaa pingaartuuvoq. Imaanngisaannassaarmi kiffaangissusermik toqqaaniarneq inuit allat inuunerannik peqqissusaannillu navianartorsiortitsisuussasoq. Illuatungaani aamma suna tamaqqinnaamik inuunermut peqqissusermullu ernumanartitsisinnaasut matoorisinnaanata. Taamaassagaluarpammi biilit, angallatit, snoescooterit allarpassuillu ingerlatsisut kisimik pinnagit navianartorsiortitsisinnaasut mattussulissagaluarpagut.

Motorcykelit eqqunneqarsinnaanerit qulakkiissagaluarutsigu sillimaniarneq allatigullu pissutsit pitsaasuunissaat eqqarsaatissatsinnut ilaassasut pingaaruteqarpoq – aquttumut aammalu sinnerinut. Taamaattumik pissutsit tallimat Naalakkersuisunit Inatsisartuniillu isummat tusarusuppakka:

1. Motorcykelerniaraanni ingerlatsisinnaanermut allagartamik pissarseqqaarnissaq inatsisaavoq. Motorcykelinilli eqqussisoqarsinnaalernissaanut ukiutigut killiliinissaq pisariaqartussaassaaq. Uanga nammineq isumaqarpunga motorcykelinik ingerlatsisinnaanissamut allagartaqalerniaraanni 21-nik ukioqaqqaarsimasariaqassasoq.
2. Illersuutit eqqortut soorlu qitermut illersuut aammalu aqqatit ingerlatsissutit piumasaqaataasariaqartut isumaqarpunga. Niaqormut illersuut piumasaqaataareerpoq, taamaaginnassaarlu.



3. Motorcykelit ingerlatsissutit allat assigalugit eqqussinermi akitsuuserneqassasut isumaqarpunga.
4. Ajutoortarneq annikillisarniarlugu aqqusernit sikuujunnaarpata aatsaat motorcykelinik ingerlasinnaaneq inatsisaassasoq isumaqarpunga. Matumanilu isumatusaarnerussaaq motorcykelinik ingerlatsisinnaalernissaq qaqugukkut aallartittassanersoq matusassanersorlu politiinit aaliangersarneqarsinnaappat.
5. Motorcykelit sorliit eqqunneqarsinnaassanersut eqqarsaatigineqarnissaa isumaqarfigaara. Tamanna sillimaniarneq aammalu nipiliortussat eqqarsaatigalugit.

Oqallinneq torersoq qilanaaraara, Naalakkersuisut partiillu aamma isumaat immersuutissaallu pissanngatigalugit.